

Vahcuengh Banh' anq Cingz Caen-saed Swhfaz Vih Minz Coi Doxgiet

—Geiq Denzlinz Yen Yinzminz Fazyen Betgveiq Fazdingz Dingzcangj Lij Hungzlieng

□ Cau Dwzfeih raiz Dahdingz hoiz

Bi 2019 ndwen 8 ngoenz 2 banringzgvaq, gicej youq Denzlinz Yen Yinzminz Fazyen yawjraen Lij dingzcangj yungh Vahcuengh caeuq bouxdangsah gangjgoj:

Lij dingzcangj: “Neix dwg mbaw lizvwnh cingqmingz mwngz, guenj ndei bw, mbouj hawj doek lonw!”

Bouxdangsah: “Baenz, gyo-mbaiq mwngz lailai!”

Laeb'anq, soengqdaengz, diuz-gaij, haidingz daengj, cienzbouh yungh Vahcuengh caeuq bouxdangsah gangj ndaej raeuzrwd, neix dwg gij ndwenngoenz baux fazgvanh Cuengh Gun song vah gihcwngz.

Lij Hungzlieng, bi 1979 ndwen 5 seng youq ranz Bouxcuengh Denzlinz Yen ndeu, daj iq caeuq bohmeah gangj Vahcuengh. Seizneix guh Denzlinz Yen Yinzminz Fazyen Betgveiq Fazdingz dingzcangj, daengz seizneix gaenq youq fazyen guhhong 16 bi.

Vahcuengh banh'anq gak minzcuz doxgangj raeuzrwd

Denzlinz Yen Yinzminz Fazyen Betgveiq Fazdingz guenj Betgveiq, Nazbij, Luzlungz(vunz senj youq) 3 aen yanghcin, gungh 36 aen hingzcwngcunh 253 aen mbanj 5 fanh lai vunz. Dieg neix miz Cuengh, Gun, Yauz, Myauz daengj minzcuz, cujyau gangj Vahcuengh, Vahgun, Vahyauz. Dangdieg Yauzcuz cawz gangj Vahyauz le, gihbwnj cungj rox gangj Vahcuengh. Vihneix, yungh Vahcuengh baenz gij fwnzggaem youq-gaenq cawqleix ndei anqgienth. Lij Hungzlieng bingzseiz cawqleix anqgienth nangqdaengz gij anqgienth yungh Vahcuengh ciemq anqgienth cungjsiq 90% doxhwnj.

Lij Hungzlieng geiq ndaej, baez nduj yungh Vahcuengh saemjleix anqgienth dwg bi 2006 ndwen 5 mwh daengz Betgveiq, Bingzlang aen dingz cunzdauq guh suhgiyenz caeuqfaenh saemjleix aen anqgienth lizvwnh cengnauh ndeu. Bouxgauq, bouxdenggaug cungj dwg vunzmbanj Bouxcuengh dangdieg, dan rox gangj Vahcuengh, dingq mbouj rox Vahgveiliuj, Vahbujdungh, hoeng fazgvanh cawjbanh dwg Bouxgun, dingq mbouj rox Vahcuengh. Seizhaenx de couh fatok gij daegdiemj bonjfaenh Cuengh Gun cungj rox, caeuq gyoengq fazgvanh yungh Cuengh Gun song vah daeuj saemjleix anqgienth, doenggvaq gaenxmaenx doxgangj doxyaeng, dauqdaej hawj song mbiengj ndei dauq. Lij Hungzlieng naeuz: “Dangh-naeuz cungj mbouj rox gangj Vahcuengh, aen anqgienth neix caen dwg saemjleix mbouj ndaej!”

“Youq dieg Betgveiq Fazdingz vunzlai yungh Vahcuengh lai, yungh Vahcuengh saemjleix anqgienth mboujdan fuengbienth vunzlai Bouxcuengh, vanzlij fuengbienth vunzlai

Yauzcuz.” Lij Hungzlieng naeuz, “Baez ndeu mwh saemjleix aen anqgienth gvanbaz gyadingz cengnauh nangqdaengz bouxdangsah Yauzcuz, bouxgauq, bouxdenggaug mwh yigen mbouj doxdoengz cungj dwg gangj Vahyauz, dou bouxguhghong youq henzgyawj cungj dingq mbouj rox, seizneix couh caenhliengh hawj bouxdangsah yungh Vahcuengh daeuj gangj baenzneix bouxguhghong cij rox, aenvih bouxgauq, bouxdenggaug caeuq bouxguhghong cungj rox gangj Vahcuengh, ndigah anqgienth saemjleix ndaej swnhleih.”

Swhfaz vih minz coihawj henzgyaiq minzcuz doxgiet

Denzlinz Yen youq dieg gapgyaiq Guengjsae Yinznanz Gveicouh, swhfaz anqgienth 80% dwg gvanbaz gyadingz cengnauh, anqgienth gizyauw miz ngaenzcienz sonjhahh boiz cienz cengnauh, ndangvunz sonjhahh boiz cienz cengnauh, ndawbiengz ciq cienz cengnauh daengj, Lij Hungzlieng caeuq gyoengq doengzsah de roxyiuj daengz, roengzsim banh ndei anqgienth, doiq hawj dieg gapgyaiq doxgiet huzndei miz cozyung youqgaenq.

Bi 2004 ndwen 5, Banh moux Denzlinz Yen Luzlungz Cin Dunzcunh caeuq Veiz moux(mbwk) Gveicouh Swngj vunz Vangmoz mboengq youq Guengjdoeng dajgoeng doxrox, song vunz youq bi 2005 daengz Denzlinz Yen Minzcwnggiz aeu mbawcingq baenzranz. Riengzlaeng miz 2 boux lwg, song gvanbaz louz lwnyez youq ranz Banh moux, hawj bohmeah Banh moux ciengx, Banh moux caeuq Veiz moux couh gak vunz gak dieg bae dajgoeng. Song vunz aenvih doxfaen youq nanz lai, gig noix caezyouq gangjgoj, ngaiz gamjcingz mbouj doxndei. Bi 2017 mboengq ndwen-cienq, gvanbaz song vunz aenvih gij saeh iq ndaw ranz doxceng, Banh moux daengz Denzlinz Yen Yinzminz Fazyen daezok dajgauq lizvwnh.

Neix dwg aen anqgienth nangqdaengz bouxdangsah gapgyaiq song swngj gih ndeu, baenzlawz cijndaej cawqleix ndei? Lij Hungzlieng naemj daengz, bouxdangsah cungj dwg youq rog dajgoeng, danghnaeuz baedauq lai baez, neix couhdwg gyalai gij cingz-bonj dajgauq, doengzseiz danghnaeuz ngaekngeu cengnauh cawqleix mbouj ndei, lij yingjyangj daengz gapgyaiq doxgiet. Mwh saemjleix anqgienth, Lij Hungzlieng gaenxmaenx dazyinx song mbiengj lai yaw lai naemj gij ngaekngeu cengnauh, hawj bouxdangsah doxhuz gajgez vwndiz, coihawj song mbiengj diuzgaij ndaej, anqgienth ndaej gajgez ndei, coihawj Guengjsae Gveicouh dieg gapgyaiq doxhuz hwnghat.

Diuzgaij lai baez baujmaenh gugih doxhuz onjdingh



▲Lij Hungzlieng caeuq bouxdangsah yungh Vahcuengh gangjgoj.

Gugih doxhuz onjdingh mbouj doxhuz onjdingh, yenzcung yingjyangj daengz ndawbiengz doxhuz onjdingh. Lij Hungzlieng lij diuzgaij baenz aen anqgienth gugih vunz senj youq cengnauh ndeu, rengzrwd baujmaenh gugih doxhuz onjdingh. Bi 2003 ndwen 10, bi 2006 ndwen 1, bi 2011 ndwen 3, bouxgauq Cinz moux, Liengz moux caeuq bouxdenggaug Liz moux, Vangz moux faenbied ciemdingh 《Mbawsaw Hezyi Cienjnyienh》 《Mbawsaw Hezyi Dajndaem Lien-guenj》 caeuq 《Mbawsaw Hezyi Doxgap Dajndaem Oij》, caemhcai iudingh lienzguenj doxbaen. Bi 2011 ndwen 10, Denzlinz Yen Vajcunh Suijdencan hanghmoeg hwnjguh aeuyungh, Denzlinz Yen Gozduj Whyenzgiz cwngsou diegbaugh bouxdenggaug Liz moux, Vangz moux youq Betgveiq Yauzcuz Yangh Lung-vaj Cunh Mbanjbaznangz haenx, caemhcai aeu ngaenzboizbouj dieg, ngaenzbouj anceiq caeuq ngaenzboizbouj gomiuz fat daengz aen cangqhoh bouxdenggaug Liz moux, Vangz moux bae. Doeklaeng aenvih caeuq bouxdenggaug doxyaeng baen ngaenzboizbouj dieg, ngaenzboizbouj gomiuz mbouj baenz, bouxgauq Cinz moux, Liengz moux couh gauq daengz Denzlinz Yen Yinzminz Fazyen, cingjgouz bouxdenggaug Liz moux, Vangz moux ei habdoengz iudingh aeu mizgven ngaenzboizbouj dieg caeuq ngaenzboizbouj gomiuz hawj bouxgauq.

Ciep ndaej anqgienth le, Lij Hungzlieng gibseiz caeuq song mbiengj bouxdangsah roxyiuj cingz-gvang, gaenxmaenx caeuq song mbiengj bouxdangsah doxgangj hezdiuz, aeu anqgienth nangqdaengz faplwd gvanhaeh gangj hawj song mbiengj bouxdangsah, caemhcai cunghab yungh faplwd, cwngecw daengj soujduenh caeuq gyauyuz, son daengj banhfap, ginggvaq hezdiuz son

caeuq diuzgaij lai baez, song mbiengj dauqdaej yaengbaenz diuzgaij hezyi. Lij Hungzlieng diuzgaij bouxgauq Cinz moux, Liengz moux dajgauq bouxdenggaug Liz moux, Vangz moux baen ngaenzboizbouj cwnghdieg diegbaugh cengnauh ndaej baenz, hawj song mbiengj cengnauh siu bae, coihawj le hong cwnghdieg vunz senj youq Vajcunh Suijdencan Gugih ndaej swnhleih guh, hawj vunz senj youq gugih minzcuz doxgiet, doxhuz onjdingh.

“Aen dem aen anqgienth labcab coegfwngz, daengz ndaw fwngz Lij Hungzlieng dingzcangj, de cungj gajgez ndaej. Neix dwg vihmaz ne?” Denzlinz Yen Yinzminz Fazyen dangcuj cwnghyenz, fuyencangj Cinz Gez naeuz, “Lij Hungzlieng caeuq doengzsah de youq mwh banh'anq yungh cingz, simndei caeuq gij hengzdoengh saedsah bae vaqgej ngaekngeu cengnauh vunzlai, coihawj minzcuz caeuq minzcuz doxgiet, hawj vunzlai doxliz gyawj le, doengzseiz vunzlai saenq ndaej caeuq haeuj-coengh, neix dwg fazgvanh song vah gihcwngz yungh hengzdoengh guh swhfaz vih minz leixniemh.”

Ndaej daengz Lij Hungzlieng daiqlingx, Betgveiq Fazdingz bingzseiz gaenxmaenx haiguh senhconz fazci, daezhawj faplwd camcaz. Aeu senhconz gyauyuz dangguh gij rengz hawj minzcuz doxgiet, youq ngoenzhaw, ndwen minzcuz doxgiet, ndwen senhconz cunghci, ngoenz fapguek daengj seiz youqgaenq, cujci fazdingz ganging guh gak loih faplwd senhconz hozdung, daezswng diegguenj vunzlai faplwd yisiz caeuq gij naengzlig ei fapbaujhoh bonjfaenh. Bi 2018 ndwen 12, Betgveiq Fazdingz ndaej aen cwngh-heuh “aen cizdij guhyienh minzcuz doxgiet cinbu baez daihbet swcigih” Swcigih Dangiveij, Cwnghfuj hawj haenx.